

四庫全書

史部

欽定四庫全書

史部

建炎以來繫年要錄卷百

六十一
六十一

詳校官侍讀學士臣陸伯焜

侍讀臣孫球覆勘

謄錄監生臣劉 楷

謄錄貢生臣馬心羅

欽定四庫全書

建炎以來繫年要錄卷一百六十

宋 李心傳 撰

紹興十有九年秋七月辛巳左中奉大夫楊惇知舒州
代還乞戒監司守臣修水利詔付戶部上曰平江隄堰
不修歲輸米比舊虧十萬斛臨安西湖民間灌溉所資
其利不細歲久亦填淤宜悉令修治

壬午上諭大臣曰官不給賣度牒已十餘年間多有輒

自披剃者可令禁止稍重其罪仍許人告庶知戢畏

左朝奉郎提舉江州太平興國宮邊知白卒癸未詔復
敷文閣待制致仕 中衛大夫忠州團練使添差荆湖南
路兵馬鈐轄馮賽卒于衡州

辛卯秦檜以甘雨應祈乞拜表稱賀上曰更五日不雨
則傷稼如浙東田高得此雨拯濟秋成可必檜曰陛下
至誠格天尤為可喜 左承議郎主管台州崇道觀許
忻知邵州忻以論事忤秦檜意屏居臨川閉門少所賓

接舉人陸九齡年尚少忻一見亟折輩行與深語至是遂與之俱九齡金谿人初入郡學時場屋無道程氏學者九齡從故編得其說獨委心焉因結茅舍旁講習魚晨夜不怠如此者十餘年

戊戌大理少卿李如岡面對乞守令悉心奉行民事顯有成績者令監司保明來上優加褒擢其弛慢違戾者亦從按劾重寘典憲從之

己亥拱衛大夫貴州防禦使建康府駐劄御前選鋒軍

正將劉超卒

庚子監察御史陳夔面對論囚多瘦死望令諸路憲臣
嚴責治獄之吏凡無家者官給之食詔刑部措置 敷
文閣直學士新知婺州吳表臣罷先是表臣自祠官中
請郡故以婺處之既又抗章乞祠以全晚節殿中侍御
史曹筠劾其敢為欺罔無所忌憚故有是命

壬寅右諫議大夫巫伋論鎮江府見於民間科借苗米
迫呼捶撻不勝其擾乞禁止其官吏重賜黜責

癸卯秦檜奏事畢上曰巫伋言鎮江預借事不知何故
闕乏乃爾可令監司經理其守臣先罷時右朝請郎曾
惇為秦檜所厚驟用知鎮江至是纔數月也 左朝奉
大夫趙達之知漢陽軍代還言湖北諸郡人希土曠間
有請佃歸業之人官司指為夫丁差科連併緣此無人
耕佃平時沃壤鞠為荊棘望寬免稅役庶有勸耕之漸
詔本路帥臣監司措置

甲辰監察御史章廈面對論州縣財賦出入之弊乞立

法禁止從之 直秘閣江南東路轉運判官鄭僑年令
再任從帥臣俞侯請也 左武大夫忠州團練使鄂州
駐劄御前破敵軍統制李山添差福建路馬步軍副總
管罷從軍

八月庚戌朔昭信軍承宣使鎮江府駐劄御前諸軍都
統制王勝卒謚毅武

辛亥勅令所言臣僚劄子乞詳議民事一罪庶協于中

今年三月庚戌葉繼奏請看詳民事被罪條法謂擅行科率及應因

害民之事以被罪者作自犯民事不注知州軍通判知縣縣令差遣緣民事被罪情實為重難以與其它公罪事體一同欲乞並依見行條法施行從之自張浚當國始議州縣官緣民事致罪者終身不許治民行之數年論者數以不便為言然終不能改

二十年十二月辛酉湯允恭又請

壬子武泰軍承宣使主管侍衛馬軍公事劉寶為鎮江府駐劄御前諸軍都統制宣州觀察使殿前司遊奕軍統制成閔權主管侍衛馬軍司公事二人皆楊存中所

薦也 祠部員外郎胡寧面對論州縣受夏秋二稅遇輸絹之時則不受絹而使輸錢遇輸米之時則不受米而使折色望自今並輸正色毋得折變見錢詔戶部看詳

癸丑復泰州興化鎮為縣

乙卯右承議郎兩浙東路轉運司主管文字王守道直秘閣守道亦繼先子也

辛酉詔行在內外諸官司添差官今後不得過二員令

所屬遵守御史臺覺察彈奏其已溢格處聽滿任

按此指揮

止為行在官司無預外路熊克小歷除去
行在二字第云內外諸司則失其實矣

宗正寺丞

王葆面對言國家役法應女戶單丁與夫得解舉人太
學生並免丁役蓋本先王仁先孤寡貴肆多士之意頃
議者歷陳丁役之弊遂有募人充役指揮臣謂進納雜
流之人物力高彊雖係單丁自應顧募至若前項三色
亦令顧募似為矯枉之過且女戶而無子孫與雖有子
孫而年在幼弱皆窮民之無告者也若遽使當力役之

事則公私所費必倍於豪強故昨來指揮寡婦有男為僧道成丁者並許募人充役正恐姦民旋行規避爾今州縣之間欲舞文者以虐無告則或指遠適之緇黃為某氏之子孫初不以存亡為別也因使寡婦守志者不免於執役困悴之患其勢迫而改行者家貲產業或破壞於後夫之手是豈朝廷勤恤民隱之本心乎得解舉人名已登於天府今乃同籍於役人太學生身已隸於上庠今乃心累於執役是二者其家或有兼丁則力役

自不妨於充募若乃單子一身而能留意於科舉奮身於庠序遂不得自別於齊民甚非陛下仁先孤寡貴肆多士之意欲望特詔有司俾是三者重加看定庶幾孤寡得所而士知愛重是日進呈上曰單丁女戶舊法免差役以許免者多有司遂有顧募之請宜令戶部詳其的確利害來上葆崑山人也既而本部乞女戶無子及得解舉人太學生單丁並免身役即特旨及因恩免解人聽募人充役官司毋得追正身從之

戶部奏上在
十二月己未

丙寅太常少卿張杞充大金賀正旦使武節大夫和州團練使知閣門事趙述副之直祕閣知臨安府湯鵬舉守司農卿充賀生辰使右武大夫吉州刺史帶御器械石清副之通好後以庶官出疆自此始述即瓌也

述改名不改

知所以紹興十六年五月乙巳充接伴已改今名恐是避二王所連偏旁也

庚午成州團練使潘長卿貴州團練使潘粹卿和州團練使潘端卿為泉利閣三州觀察使時吳國長公主入朝故有是命

辛未詔浙東諸州強盜該配者並刺充沿江諸軍都統
制下使喚俟盜賊寧息如舊以權本路提刑秦昌時有
請也

壬申右朝散大夫兩浙轉運判官曹泳直祕閣 權尚
書戶部侍郎兼權樞密都承旨宋貺兼權知臨安府
癸酉大理正元龜年面對乞自今諸州奏案内有不該
留禁待報人並先次責出詔刑部看詳

甲戌詔以景靈宮繪像功臣之副歲于天章及祕閣復

故事也

乙亥大理正周墮面對論諸郡擅支借轉運司錢物充公事及收支官物別置私歷之弊乞戒監司稽察舉劾丙子詔申嚴行下

戊寅詔荆南府應劉錡舊管軍馬並發還侍衛馬軍司九月庚辰朔大理寺丞石邦哲面對論天下之法宜總於大理而一路一司一州一縣與夫在京省臺寺監有司局務各有專法大理不能通設有論罪斷刑皆出臨

時取會移文待報關決淹延或法有重輕供報不盡莫得稽考則罪有出入之弊欲望特詔三省委之刑部關會應干官司前後被受立到專法各錄兩本付之法寺斷刑治獄兩司以憑遵用事下刑部省詳如所請

明年正月

已丑刑部奏下

丙戌左奉議郎知大宗正丞楊偁面對乞太學私試鎖院考官不得輒歸私家出入傳送之禁並依補試法事下禮部其後但令辰入昏出而已

明年二月辛亥施行

辛卯惠州刺史知閣門事宋籤孫充大金賀正旦副使
以趙述病告也

壬辰左朝奉郎提舉兩浙東路常平茶鹽公事秦昌時
直祕閣提點本路刑獄公事本路帥臣趙不棄申昌時

悉心賑濟全活甚衆檜進呈乃有是命

昌時檜兄
子已見

癸巳詔新通判汀州李璫特放罷坐嘗與新州編置人
胡銓交結凌蔑州縣為守臣張棣所劾也

乙未大理寺丞孫敏脩面對論諸路被差鞫獄官多求

避免乞量增賞格詔送刑部

庚子大理寺丞郭唐卿面對論四方案牘乘上木寺取會未圓情節往往不以時報乞申嚴行下從之大理寺丞石邦哲令再任初有詔法寺斷刑官願再任者聽至是從其請也

壬寅左朝散郎陳瑀知饒州代還論諸縣保正副長科役煩多尤為民害若令當役良民皆許顧人自代則受顧之人習熟州縣通曉法令縣官非理相加未必畏懼

官吏雖欲恣其谿壑之欲有所不能望特詔有司許凡當役保正副長除情願應役之人聽其從便外並許顧人代役官司不得追呼正身詔戶部看詳申省璫建陽人也

甲辰戶部侍郎李椿年言諸路錢帛各有椿發條限比年往往公然移易妄用有誤歲計欲將移改侵借去處不以去官並從本部申取朝廷指揮重賜黜責從之

戊申上命繪秦檜像自為贊曰惟師益公識量淵冲盡

闕異議決策和我長樂溫清寰宇阜豐其永相子凌烟

元功尋出示羣臣藏于祕閣

熊克小歷載此事在紹興二十一年十月蓋誤

冬十月

按是月巳酉朔

庚戌言者論監司州縣樂於知事以厚

利陷進奏官遂致聽探事宜漏泄機密詔進奏官收受計贓坐罪官吏依擅支朝廷封樁錢物法仍令監司互察從戶部請也

壬子上諭大臣曰有司立法不可太重恐難必行宜令勅令所檢會日前建明有不可行者並須改正

癸丑觀文殿學士提舉萬壽觀秦煒為郊社禮儀使渡江後五使以祠官為之蓋自此始 大府寺丞李燾面

對論比年州郡監司多差未出官選人押綱以覲賞典緣未諳世務公然盜用望申嚴行下詔送戶部其後本部言初官亦有可以倚仗因賞典太優欲今後止依本

等推賞從之

熊克小雁作太常寺丞眉山李燾按燾此時方自嘉州推官丁憂家居克蓋誤也戶

部乞依本等推賞

在十一月丁未

丙辰左朝請郎主管台州崇道觀朱敦儒守本官致仕

從所請也

己未右朝請郎幹辦行在諸軍糧料院王珏提舉兩浙西路常平茶鹽公事先是秀州歲以錢給亭民煮鹽至十五年積十九萬七千餘緡不給亭民無以煮鹽訴于朝上曰亭戶宜恤不則遁去其害非細可令戶部究實於是用珏珏至官踰年盡償所負又開華亭海鹽河二百餘里鹽滋得通流其溢以溉田經界之法行甚害者三百六十九事其七千二百二十七戶尤為病珏奏除

之珏安石曾孫也

上語在八月戊辰併附此日歷所載甚畧今以晁公邁所作珏墓誌增修

右承議郎知新州張棣提舉荆湖北路常平茶鹽公

事以其再劾胡銓也至官一日卒時責授濠州團練

副使洪皓在英州閩人右承務郎倪譽為守譽老矣內

無與主聞棣以巧中遷客取使節欲劾之即使兵馬都

監伺其隙捕皓家奴寘獄中釀成其罪未及發而譽死

事乃解

胡銓跋戒論和議詔書云十九年春新興守張棣觀望權勢乞竄銓海外棣即日持節湖北按

棣劾銓過海在去年之冬去此已久當是因再劾李燾遂超遷之銓蓋小誤今畧脩潤庶不牴牾

降

受文州刺史辛永宗特勒停送肇慶府編管永宗為湖南馬步軍副總管居邵州永宗以嘗立軍功給真俸守臣右朝散郎呂稽中知永宗為秦檜所惡劾其冒請全俸當計以贓乞下守臣閱實稽中先以計取永宗所受御劄送檜矣永宗由是不能自明詔侵支過請給令稽中依條追理稽中選郡僚之苛刻者籍其家以償欠一簪不得留既而稽中語其僚曰前赴其家燕集以其器酌壽今乃不見豈隱之耶其殘刻如此

庚申直龍圖閣主管洪州玉隆觀梁棄卒

辛酉上諭大臣曰西溪標撥馬軍寨地可令守臣宋貺親往檢視毋得侵掘塚墓多占民田 昭宣使高州刺史趙轍提舉佑神觀免奉朝請 宣政使明州觀察使提舉江州太平興國宮馮益令再任

壬戌德安府忠節卒蕭龍挾刃殺守臣右朝奉大夫王伯淮于廳事傷而不死衆執隆隆舉刃自殺伯淮以聞詔仍舊治事

丙寅敷文閣直學士知紹興府趙不棄卒

己巳初復諸陵攢官薦新之禮用太常博士晉陵丁晏
明請也

庚午右奉直大夫知平江府王昫直祕閣知建康府兼
行官留守司公事建康自置留守後以庶官為之蓋自
昫始

辛未左朝散大夫趙令衿知泉州左承議郎添差通判
臨安府郭城知秀州

乙亥閤門祇候王允昌為閤門宣贊舍人允昌勝子特錄之

丁丑詔右朝奉大夫提舉江南東路常平茶鹽公事張昌依舊兼權提刑仍許薦舉以昌言一路選人改官久無職司文字乞除正官故也

十有一月癸未祕書省著作佐郎劉章面對言禮莫重於祭而郊廟為尤重神宗元豐間嘗詔陸佃等以太常寺置局編類成書凡三十卷郊廟奉祀禮文今陛下以

明聖之資當述作之任而縉儀未紀乞命官為紹興郊廟奉祀禮文以續元豐之書上嘉納之

初太傅咸安郡王韓世忠之為淮東宣撫使也張浚在都督行府以世忠有功用上所賜空名告授其子彥朴彥質皆右承務郎久之除直祕閣賜三品服已而吏部審驗言無立功實跡當奪所授官甲申世忠請以郊恩改奏依舊帶行章服職名詔先次作白身人改奏俟補

正日取旨

乙酉尚書工部員外郎楊適卒

丁亥尚書省勘會昨降指揮令諸路監司郡守將寬剩錢物每季開具申省撥充月椿今來逐路月椿錢撥填已見次第詔今後更不開具

辛卯上親饗太廟至櫺星門降輦步趨齋殿虛小次不入

壬辰合祀天地于南郊太史局令胡平奏帝座及三百星體明耀禮畢還御麗正門建金雞赦天下

辛丑尚書戶部侍郎兼權直學士院李椿年罷椿年首
陳經界之議及是始畢會民多訴經界不均者殿中侍
御史曹筠因劾椿年求薦劉大中陰交趙鼎皆竊其權
柄漏其昵談今游舊將之門傾危朝廷尤為可慮兼經
界已定若不別委他官覆實則椿年私結將帥曲庇家
鄉之罪無以厭塞公議詔與外任 右諫議大夫兼侍
講丞仍兼權直學士院以諫官攝詞臣非故事也 左
修職郎周麟之行太學錄

甲辰詔諸郡行鄉飲酒之禮以取士先是司農卿湯鵬舉請對論舉人多冒貫求試乞於未下科詔前令州縣長吏籍定來歲當應舉人名州縣學職事覆實申教授預先引保委無偽冒然後許赴鄉飲酒若臨時投狀射保者並不收試事下禮部至是頒行焉

乙巳右諫議大夫巫伋試給事中殿中侍御史曹筠守侍御史監察御史章廈守右正言監察御史陳夔為中書門下省檢正諸房公事伋仍兼侍講權直學士院夔

仍兼崇政殿說書

丙午上謂秦檜曰經界人戶多訴不均當與受理若不
受重稅將無以輸納檜曰臣嘗諭戶部侍郎宋貺宜體
聖上均稅本意有未均處亟與改正

丁未戶部上州縣墾田增虧賞罰格初議者謂淮南湖
北民稍復業而曠土尚多請立賞格至是本部以其格
上之每州增墾田千頃縣五百其守宰各進一官即州
虧五百頃縣虧五之一皆展磨勘年詔頒之諸路

二十四年

月癸未所
書可參考

十有二月庚戌祕閣修撰提舉江州太平興國宮王賞
卒贈敷文閣待制

壬子軍器監王會權尚書兵部侍郎

祕書省著作佐郎林機面對言訪聞有異意之人匿迹
近地窺伺朝廷作為私史以售其邪謀偽說臣若知而
不言則異日害正汨真之患臣實任其咎欲望密加搜
索嚴為禁絕甲寅上謂秦檜曰此事不應有宜行禁止

許人陳告仍令州縣覺察監司按劾御史臺彈奏並取

旨優加賞罰於是李光之獄遂起

明年三月丙申行遣

右朝請

大夫知婺州周三畏復敷文閣待制知平江府

丁巳金人弑其主亶亶立十五年平日嗜殺晚年尤甚

左右近侍少不如意即手刃之兵部尚書賽音奇辰護

衛將軍巴克沁廣威宿直將軍塔斯定遠皆以罪族又

殺其后費摩申氏於是宗族大臣皆懼不免相與結約

以伺其間至是駙馬都尉唐古辨與尚書右丞相岐王

亮太常卿烏達宿直將軍額爾楚克尚厯局使高景山
寢殿小底興國努謀因亶醉卧收其兵械夜入霄儀殿
弑之有護衛將軍瑚圖克初不與謀亮等入殿門亶驚
起求弓刀不獲瑚圖克遽以所持鎗刺亶于殿壁衆爭
前斫殺之遂閉殿門興國努傳旨斂取護衛弓刀然後屏
出敷德殿門詐召大臣左丞相沂王宗賢夜半入宮為所
害都元帥曹國王宗敏繼至亦縊殺之遂立亮亶時年
三十一宗賢金太宗晟子宗敏太祖旻子也

此以苗耀
神麓記修

入耀稱亮為平章宗賢左相宗敏右相按亮十八年九月已拜相而定赦書稱宗敏為元帥曹國王今從之
耀又稱唐古辨為唐古下與金人誅宗本等詔書所云差不同今從金詔

戊午直龍圖閣知潭州劉昉言姓名偶與前代不令之

臣相犯請更名旦從之 是日金主亮即位時年二十

八已未大赦文武官皆進一秩賜民租稅一年追廢亶

為東昏王以謂刑餘之人故不得入廟追尊父宋王宗

幹為德宗改元天德
亶追謚見三十一年十一月熊克小歷載亶死在己未誤也蓋丁巳

殺亶戊午立亮已未肆赦爾金國赦書朕惟太祖武元皇帝神武應期奄有四海以天下大器授于太宗文烈

厭世不忘先遜憑几宣命屬之前君以繼洪業十有五
年而昏虐失道人不堪命宗族大臣協心正救久而弗
悛仰奉九廟之靈已從廢黜亦既殞滅宗族大臣咸以
太祖經營締建所繇垂統推戴眇躬嗣臨天下朕以宗
祖之重義不獲已爰受命之初兢兢若涉淵冰未知攸
濟尚賴股肱三事文武百僚同心附翼以底于治宜布
維新之令以宏在宥之恩可從皇統
九年十二月十一日改為天德元年

壬戌上恭謝景靈宮退御西齋殿進膳召近臣對御茶
酒癸亥亦如之甲子復詣太一宮至是遂如故事

丁卯封紅霞帔劉氏為宜春郡夫人吳氏為新興郡夫

人吳氏名玉奴中宮近屬也

吳氏紹興二十二年五月
進封才人制詞云乃椒房

之懿
屬

己巳宰執進呈四川管押扈衛人乞推賞上曰發來扈衛人已滿千人可下制置司自今歲募三百人赴闕

丁丑金國賀正旦使龍虎衛上將軍殿前右副都點檢完顏克副使昭武大將軍西上閣門使劉箴入見克亮弟也以病故改用是日尚書祠部員外郎胡寧祕書

省著作佐郎劉章並罷章有士望太師秦檜疑其不附已而寧本因其父兄與檜厚故召用之至是檜知寧兄

徽猷閣直學士致仕寅之貧因其往劔州省覲世母遺以白金寅報書曰願公脩政任賢勿替初志安內攘外以開後功檜以為譏已始怒之寅嘗游嶽麓寺大書壁間云是何南海之鰐魚來作長沙之鵬鳥於是帥臣劉旦方欲摺摭張浚諸人之罪而旦潮陽人也亦大怒復訟寅于檜侍御史曹筠即奏寧兄阿附趙鼎章居衢州與鼎賓客交通故二人私相朋比衆所指目不知每懷異意欲以何為若不罷斥無以安衆心乃以章通判均

州而寧克夔州路安撫司叅議

熊克小歷二人之罷在今年九月蓋誤

戊寅太常丞林大鼎尚書刑部員外郎湯允恭並為監察御史

是月資政殿學士致仕王次翁薨于明州次翁既引年秦檜憐之饋問不絕及薨贈恤甚厚責授濠州團練副使解潛居南安軍至是疾劇有朝散郎張九成往省之謂曰太尉平日所懷亦有不足者否潛泣曰平生惟仗忠義誓與敵死以雪國耻而不肯議和遂為秦公所

斥此心惟天知之九成曰無愧此心足矣何必令人知

潛曰聞此言心中豁然矣即逝九成壯之時秦檜猶怒

潛故喪不得歸運檜薨乃聽

二十六年正月癸亥歸葬

是歲宗室子賜名授官者十有七人 諸路斷大辟三

十一人

建炎以來繫年要錄卷一百六十

建炎以來繫年要錄卷一百六十金人地名考證

賽音奇辰

原書作賽居
帝誤今改正

巴克沁

原書作八斤與金
史同並誤今改正

塔斯

原書作特塞即金史
之特思並誤今改正

費摩

原書作裴磨誤改
見卷一百十八

額爾楚克

原書作幹諸即金史之阿里出虎
幹諸金熙宗時人官宿直將軍熙宗木

紀內載其事與本卷同此幹諸係
阿里出虎音轉之訛並誤今改正

典國努

原書作典國奴即金史
之大典國誤今改正

瑚圖克

原書作忽突即金史之忽土並誤今改正

唐古

原書作同古即金史之唐括誤今改正

烏達

原書作烏帶與金史同並誤今改正

欽定四庫全書

建炎以來繫年要錄卷一百六十一

宋 李心傳 撰

紹興二十年

歲次庚午 金海陵
場主亮天德二年

春正月甲申金國賀

正旦國信副使西上閣門使劉箴辭行國信使殿前右

副都點檢完顏充以病不能入見命醫官趙琦送至境

上金主亮亦遣天使趣之充歸至北廷而卒

此據苗耀
神麓記

丁亥太師尚書左僕射秦檜趨朝有挾刃於道者遮檜

肩輿欲害之傷行程官數人一軍校奮而前與之敵衆奪其刃遂擒送大理寺驗治則殿前司後軍使臣施全也自罷兵後凡武臣陳乞差除恩賞檜皆格之積百千員無一得者客行朝餓且死者歲不下數十至是全以所給微而累衆每牧馬及招軍勞而有費以此怨忿遂潛携刃伺檜出乞用兵因而鼓衆作過若不從則害檜壬辰磔全於市至是每出則列五十兵持長槌以自衛

此以熊克小歷及林泉野記參修野記又云檜以此激軍中使無鬪志人人思亂

甲午以普安郡王第三子惇為右內率府副率 正侍

大夫華州觀察使提舉台州崇道觀段恩卒

恩初見建
炎三年是

時不知為何官於此始
見于日歷故表出之

己亥承信郎閤門祇候幹辦御輦院劉允升為修武郎
閤門宣贊舍人

庚子敦武郎光州光山縣尉兼主簿都飛虎除名廣州
編管坐受商人貨物縱令渡淮及被差捕賊不即迎敵
致令出界故也

癸卯諸路經界文字令戶部措置結絕未經界處委轉
運司并守臣仍限一季少傳寧遠軍節度使領殿前
都指揮使職事楊存中封恭國公監察御史湯允恭
面對言古有金作罰刑蓋先王不忍之心民知有誤俾
出金以當其罪後世著在律文有罰銅之條自一斤至
百有二十斤而止陛下仁覆四海視民如傷前後欽恤
之詔深切著明比來州縣或有杖罪與徒勒令納錢乃
得免少數十百緡多一二千緡格之律文則罰溢於罪

又收在別歷吏得為姦望敕州縣凡罪人當罰毋多令
納錢以濟妄用及是進呈上曰自有常法於是申嚴行

下

丙午兩浙轉運判官曹泳言右承務郎李孟堅省記父
光所作小史語涉譏諂送大理寺初光在貶所常作
私史孟堅間為所親左奉議郎新諸王宮大小學教授
陸升之言之升之訐其事遂命泳究實申省及是進呈
上曰光初進用時以和議為是朕意其氣直甚喜之及

得執政遂以和議為非朕面質其反覆固知光傾險小

人平生蹤跡於此掃地矣升之山陰人也

日歷紹興十九年十月壬

戌左奉議郎新淮西提點刑獄司幹辦公事陸升之充諸王宮大小學教授恐即緣訐此事得遷當考

右承議郎利州西路安撫司書寫機宜文字吳援為右

朝散郎直祕閣通判利州賜三品服援自興州入對故

有是命

二月戊申朔將作監丞李嚴老面對乞戒諸縣令佐毋

得分鄉自至村落催科詔申嚴行下嚴老邦彥子也

少傅領殿前都指揮使職事楊存中乞以大禮所得親屬封號為故女孺人換一道號許之後贈冲妙鍊師

己酉顯謨閣直學士常同卒於海鹽縣

庚戌軍器監丞齊旦面對乞春月禁民採捕秦檜曰正為孳育之時上曰此係利害乃下之刑部既而本部言春月在法不許採捕若止科違令之罪恐難禁止今欲犯者杖八十從之旦壽光人也 初右朝請大夫路彬

提點廣西刑獄公事代還言靜江府昭州夏稅折布錢

最重於諸州蓋自都督行府一時措置折納價錢比舊
增及一倍以上廣西地瘠民負百姓艱於輸納道遠不
能赴愬今寇盜寧息海內晏清自宜蠲減是日秦檜奏
事畢上諭曰路彬言折布錢因張浚增及兩倍可令戶
部者詳裁減戶部言二郡歲撥上供布九萬二百八十
一匹欲於見納價上三分減一每匹折納錢一千從之
上又曰昨令監司守臣任滿並以民事奏陳彬可除職
名與見關監司以示激勸

彬奏疏以正月丙午降出上諭
大臣除彬職名在二月戊午合

併書
之

壬子權戶部侍郎宋貺言契勘經界本意務要草去侵
耕冒佃詭名挾戶逃亡死絕虛供抵當差科不均鄉司
走弄二稅之弊使民有定產產有定稅稅有定籍後來
緣以畫圖供帳分立土色等則均任苗稅轉生姦弊遂
致久不能結絕今欲乞令轉運并守臣恪意措置瀕管
草去逐件情弊使田產稅賦着實依限一切了辦如州
縣尚敢遷延出違日限從本部申奏朝廷乞賜放罷若

轉運不切督責亦乞黜責所有每路差本所幹辦官一員前去說諭催督措置及諸路所差覆實官限指揮到並罷從之

庚申詔海外四州軍昨令與免經界緣土產瘠薄應稅租仰並依舊額施行時瀘南沿邊安撫使馮楫亦抗疏論其不便於朝於是瀘叙州長寧軍皆得免

瀘南免經界事曰歷

不見降旨年月當考按江陽志三邑稅賦額祥符年雜色二十九百石慶元年雜色九千五百石不知何時所

增也右朝請大夫路彬直祕閣利州路提點刑獄公事

辛酉右武大夫合州刺史兼閣門宣贊舍人侍衛馬軍
司統領官黃宣等二十四人並添差諸路鈐轄兼都監
至將副罷從軍用主帥成閔請也

丙寅初作玉牒所

辛未集英殿修撰知廣州薛弼陞敷文閣待制

乙亥直徽猷閣廣西路提點刑獄公事方庭實卒

丁丑閣門請自今北使在廷非侍從而嘗借官出使免
起居如見充接伴即依所借官叙位從之

是月安南進馴象十

三月庚辰金主使龍虎衛上將軍侍衛親軍馬步軍都
指揮使完顏思恭翰林直學士通議大夫知制誥翟永
固來報登位遺上金注梳二綾羅三百良馬六水固檀
州人宣和六年進士也

癸未端明殿學士簽書樞密院余堯弼參知政事給事
中兼侍講權直學士院丞仍為端明殿學士簽書樞密
院事

乙酉尚書禮部員外郎兼玉牒所檢討官王曦守起居

舍人兼權直學士院

口歷不書曦權直
此據本院題名

丙戌參知政事余堯弼為賀大金登位使鎮東軍承宣使知閣門事鄭藻假保信軍節度使副之合行事并支賜推恩並依未裁減已前正旦生辰使例以堯弼有請也 勅令所奏定諸州公使庫月支供給令帥臣毋過二百緡下至外縣監當十緡凡八等仍先支外縣該載不盡者比附定數舊例數少者不在增添之限從之

戊子觀文殿學士左通奉大夫提舉萬壽觀祕書省兼侍讀秦熈為特進加大學士充觀使制曰上宰特高百執既有舊班真儒並出一門豈非身會故事前宰相官至使相已上始降麻至是以熈視見任宰臣特令鎖院庚寅北使辭行 權尚書禮部侍郎陳誠之兼侍講太常少卿兼權吏部侍郎張杞罷以侍御史曹筠劾其附會李椿年也

右正言章厦論太常寺主簿權吏部員外郎葉縑項為

李光所私及光抵罪常懷怏怏又嘗私親舊將受其賄
賂望賜罷斥以清華轍從之丙申詔責授建寧軍節度
副使昌化軍安置李光永不檢舉右承務郎李孟堅特
除名峽州編管先是孟堅以小史事繫獄至是獄成光
坐主和議反覆後在貶所常出怨言妄著私史譏謗朝
廷意在播揚僥倖復用及與趙士儂於罷政後往來交
結孟堅亦為父兄被罪責降怨望朝廷記念所撰小史
對人揚說故有是命於是前從官及朝士連坐者八人

徽猷閣直學士致仕胡寅坐與光通書朋附交結譏訕朝政龍圖閣學士提舉江州太平興國宮程瑀坐初除兵部侍郎日以緜帛遺光且貽書云比來無知愚皆以視前為戒可為嘆息徽猷閣待制提舉江州太平興國宮潘良貴坐嘗以團茶寄光光貽良貴書其別紙云仲暉不敢作書患難至能出一隻手乎仲暉樓炤字也良貴答書曰叅政患難至此極矣更以道自處仲暉別紙已付之但恐時未可耳直秘閣宗穎坐嘗寄光書云孤

寒寡援方賴鈞庇忽聞遠適豈勝惶駭本欲追路一見
失於探伺不果如願寶文閣學士提舉江州太平興國
宮張燾左承議郎新知邵州許忻左朝奉大夫新福建
路安撫使叅議官賀充中左奉議郎福建路安撫主管
機宜文字吳元美坐各與光相知密熟書劄往來委曲
存問意光再用更相薦引詔寅特落職瑀良貴穎並降
三官燾忻充中元美並降二官

戊戌上謂大臣曰近有人上書陳農田利害農者天下

之大本可即施行是日內降詔曰昨李椿年乞行經畧
初欲去民十害遂從其請今聞寢失本意可令戶部逐
路選委監司一員逐一查看詳應便於民者依已經界施
行其乖謬反為民害事目並日下改正具申省部日後
以當否取旨黜陟間遣御史前去訪察

庚子余堯弼辭行 詔丞伋兼權參知政事 徽猷閣

直學士知平江府周三畏落職與宮觀差遣初常同既
卒三畏遣通判府事蘇師德越境往祭且賻錢二千緡

祭文有云姦人在位公棄而死師德同女婚祭文其子
新遂安尉玘所草也侍御史曹筠因奏三畏頃為大理
卿鞫勘岳飛公事猶豫半年不決朝廷特加杖拭終不
懷安乃與師德陰相交結若不亟去有害治道於是師

德送汀州編管而玘勒停

玘勒停在
四月癸亥

壬寅右正言章履奏右承議郎致仕胡寅天資允悖敢
為不義寅非胡安國之子不肯為親母持服士論沸騰
此其不孝之大罪也寅初傳會李綱後又從趙鼎建明

不通隣國之問其視兩宮播遷如越人視秦人之肥瘠
後來梓宮既還皇太后獲就孝養寅自知前言狂率乃
陰結異意之人相與睥睨作為記文以為今日仕進之
人將赤族而不悟此其不忠之大罪也伏望陛下為宗
廟社稷長慮特賜威斷詔寅責授果州團練副使新州
安置

寅建明使事已見紹興六年五月寅
申明追服事已見紹興十年七月

右承事郎

劉堯勛直祕閣堯勛光世少子也

甲辰戶部侍郎宋貺言訪聞州縣近因經界將額管苗

稅均於未開墾荒閑田土上一例起催致人戶無從輸
送往往逃移失業望委諸路轉運司將見虛增苗稅日
下徃催從之

乙巳上書秦檜父故玉山縣令敏學墓碑首曰清德啟
慶之碑命詞臣王曦撰文以賜上謂檜曰近日邊境絕
無事行移簡少民得休息殊為可喜 戶部言常平職
在興農田水利今州縣圩岸多損田畝多荒欲委諸路
常平官措置興修不得因而擾民將來取旨陞除從之

是月金主亮詔中外臣庶皆令直言朝政闕失與軍民利害如有可採自應得用其或不當弗加之罪苟能裨補公私別議旌賞初東昏王亶之被弑也亮身預其謀及是事定當時同謀者亮皆以弑逆之罪加之曹國王宗敏者屬竊尊亮忌之既為所殺納其妃於宮中梁國王宗弼開國有勲惟一子韓王亨亦以無罪死左副元帥薩里罕有戰功亮詐為書俾人誣告并其子御史大夫沙津殺之夷其家

夏四月丁未朔司農卿湯鵬舉直顯謨閣知婺州直祕閣兩浙轉運判官曹泳陞直徽猷閣知明州時鵬舉送北客未還也

庚戌右朝散大夫知揚州榮巖為兩浙路轉運判官既而侍御史曹筠言巖本與趙鼎從游甚密緣巖在偽楚時有所汙染被謫甚重鼎猶未敢援引今朝廷俾守維揚已為闊略又引至行朝豈不惑四方之觀聽望賜罷

黜以慰公議詔巖還舊任

王明清揮塵錄稱高宗與巖有霸府之舊秦檜屢欲加害

而不從或可脩闢入此詳見紹興
十一年九月王俊首張憲謀叛注

壬子詔自今沒官田土更不許人承佃並撥歸常平司
與見興修水利田一就措置用戶部請也既而本部又
請在 cities 空閑官田及戶絕房廊白地亦令常平司拘

收從之

後皆在是
月戊下

乙卯安德軍節度使開府儀同三司知大宗正事士奎
充萬壽觀使任便居住以老病自請也擢其子右奉議
郎不微直祕閣

已未起居舍人兼玉牒所檢校官王暉言本所見修玉牒切見靖康二年太師秦檜入狀軍前乞存趙氏社稷兼在軍前與莫儔爭辨以全家保天族并在中京代上皇作書與國相建明和議等大節並已修入玉牒外所有元降下推戴事跡乞備錄全文關送國史日曆所照應施行從之

辛酉封普安郡王女為碩人用宗室總麻親任節度使封女例也

已已上謂大臣曰久雨不致妨農否民田須常瀦水宜
令州縣修陂湖之利以備缺雨灌溉既又命每季具施
行次第申省

庚午宣政使明州觀察使提舉洪州玉隆觀馮並卒

癸酉左朝奉大夫新知廬州吳達言兩淮之間平原沃
壤土皆膏腴宜穀易墾稍施夫力歲則有收而莫加工
茅葦翳塞望置力田之科募民就耕准畝賞以官資闢
田以廣官莊自今歲始今欲江浙福建委監司守臣勸

誘土豪大姓赴淮南從便開墾田地歸官莊者歲收穀
五百石免本戶差役一次七百石補進義副尉至四千
石補進武校尉並作力田出身其被賞後再開墾及元
數許參選如法理名次在武舉特奏名出身之上遇科
場並得赴轉運司應舉從之

熊克小歷稱在武舉人之上
去特奏名出身五字蓋

也誤

乙亥衡州編管人宗杲移臨江軍以其長惡不悛聚徒
貶所撰造飛語肆為譏謗也

是月金主亮誅太傅領三省事晉國王宗本及尚書左丞相兼中書令越國王唐古辨領燕京行臺尚書省事楚國王秉德判大宗正事衛王宗義東京留守代王宗懿等先是秉德嘗燕宗本家海州刺史烏爾袞言國王有福似趙太祖秉德喜其後秉德出領行臺省事欲在外說誘軍民使宗本為內應辨嘗為宗本言內侍張彥善相人亦言太傅當為天子宗義言太傅正是把太祖大家計人宗本遂與尚書省譚史蕭玉謀即圍塲弑亮

玉以告秘書監蕭裕裕以聞故皆坐死宗本太宗晟之

子宗懿宗本兄秉德宗維孫也

據金人誅蕭裕詔云宗本太宗之子又誅宗本

等詔云某有兄東京留守

遂擢裕尚書左丞參知政事而汴京行臺

廢

兩國編年有天德三年遷都詔云川併尚書之亞省會歸機政於朝廷故增入

自金太祖旻

起兵即以尼瑪哈烏舍羅索達蘭薩里罕之徒繼為將

相惟羅索在兵間以病死後尼瑪哈首罷兵柄憤恚而

亡達蘭固新薩里罕之徒相繼誅而旻晟子孫勦戮幾

盡

以金人誅宗本等詔書及金國雖書參究修立張棟金國志誤以宗本為尼瑪哈已辨之見建炎元年注

五月丁丑右朝散大夫彭合知臨江軍還言清江縣民輸苗米每石加耗七斗乞蠲免從之上謂大臣曰合知縣官嘗為監司列薦今可與監司知州差遣乃以合知永州

庚辰詔申嚴諸軍差承接文字使臣之禁賞錢千緡有官人轉一官許人告初講和罷兵之次歲言者論艱難以來諸郡及監司例遣使臣於行在劄探比來邊境寧謐自應罷此乃但改作承受妄說虛傳為害甚大詔臨

安府覺察叔捕上幸學之年五月又詔諸軍都統制下
承接文字使臣並令歸軍至是樞密院以為言故申其
禁

癸未特進觀文殿大學士萬壽觀使秦熈為奉安中興
聖統禮儀使先是起居舍人兼玉牒所檢討官王暉等
紀上中興之蹟以進號中興聖統己丑奉安于景靈宮
天興殿之西以玉牒殿未成故也禮畢太師尚書左僕
射提舉編修玉牒秦檜率百官拜表稱賀自檜再相每

進書必下左藏庫權貨務取金繒以進謂之禮物

此禮不知

起於何時臣嘗恭請乾道宣諭聖語云此乃秦檜詭譎所為故因事附見當求它書考其年月辛卯燹

言先期陰雨是日雲霞絢綵晴日麗天茲誠上穹垂祐

望宣付史館從之曠時兼權直學士院草檄加恩制曰

大風動地不移存趙之心白刃在前獨奮安劉之略檄

大喜

王明清揮塵後錄云王曠為少蓬權直禁林秦檜之加恩取此聯入制詞中翌日即除禮部侍郎兼

學士年表曠是時竇為起居明年二月乃除禮部侍郎清誤記也

癸巳減汀州上杭武平二縣今年上供錢銀之半連城

清流二縣減三分之一以守臣右朝奉大夫張昌代還
有請也

甲午金國賀生辰使副侍衛馬步軍都指揮使完顏思
恭翰林直學士翟永固見于紫宸殿思恭等來報亮代
立既出境就遣來賀

甲辰祕書少監湯思退言近玉牒所關到太師秦檜推
戴趙氏事跡竊意師臣謙不伐功特以事干玉牒姑具
大槩其餘間關執節之久本末未能備盡望令檜詳錄

奏聞宣付史館庶得備言廣記以詔無窮且以知聖朝
得一忠義大臣成效如此上謂檜曰思退乞以卿靖康
事跡詳記為別錄以示天下後世可依所奏檜謙退久
之上曰不然無以使後代知卿忠義簽書樞密院事巫
伋曰秦檜忠義大節天下所共知然要當屢書不一書
使後世奸臣賊子聞風悚懼上然之

乙巳左承議郎汪應辰通判靜江府應辰初入館以論
事去至是凡十年

六月丙午朔詔修國子監先是太學錄周麟之面對論上庠敞漏弟子員滋多几席不足容之非所以崇嚴奉而廣教育故有是旨

丁未上曰近有進士上書言兼併之家多請射侵漁民田宜嚴立法秦檜曰比刷逃戶田宅並令歸官正以暗消此弊上曰善

戊申右正言章履乞令州縣收納二稅有出剽之數並附赤歷不許擅撥歸公使庫仍令監司覺察從之

已酉感德軍承宣使提舉萬壽觀梁邦彥守本官致仕
從所請也

癸丑太師秦檜以進書加恩辭不受詔封其次孫女令
人秦氏為永嘉郡夫人

甲寅徽猷閣待制知台州蕭振始至官初海寇聚眾連
年其勢益熾至是犯台之臨門寨章安鎮故命振為守
振抵官秦乞殿前司水軍統制王文同捕許之交至振
謂之曰濱海之門數年苦賊若能勦除願悉兵力戰以

寧一方倘或敗事振當奏劾交即具艦入海與賊逆敵果敗其眾餘黨散去振以數千緡犒交士卒為之奏功

郡境遂寧

王文明年三月辛亥自右武大夫和州團練使荆湖北路兵馬都監陞帶福州兵馬鈐轄

不知此時為何官也

丙辰壽國育聖夫人王氏卒王氏上乳母也輟視朝五

日追封福壽國夫人賜帛二千匹錢萬緡為葬費

戊午出內府錢十五萬緡付兩浙轉運司創皇城司寨

三千間限一季畢

庚申捧日天武四廂都指揮使武信軍承宣使新江南西路兵馬鈐轄李橫移東路橫寓居信州適貴溪魔賊竊發守臣左朝散大夫李檉檄橫統弓兵以備策應遂獲安堵檉又遣離軍人拱衛大夫果州團練使添差東南第五副將孫青統兵出戰旋至撲滅乃詔青釐務而帥臣王晌劾檉及知縣事左奉議郎葉顯右朝散大夫提舉常平茶鹽公事權提刑張昌不能覺察致賊嘯聚並免官仍削二秩顯仙游人也

李檉等降罷在是月己丑

癸亥特進觀文殿大學士萬壽觀使兼侍讀秦熤以進書恩遷少保具子直敷文閣壻堪並陞直顯謨閣左

朝請郎何大圭直祕閣大圭進聖德頌故有是命初大圭之削籍也張浚為之保叙至是以短卷譖浚於秦檜

士論薄之

日歷紹興二十八年正月丙戌朱倬劾大圭章疏稱因譖浚得職名

丙寅大理寺少卿許大英面對論川廣奏按往復淹滯乞委憲臣考察丁卯左朝散郎康寧知瓊州還乞諸郡重辟疑獄奏按並專人齎投詔並令刑部看詳

已已直祕閣王湛知閩州還乞申嚴法禁守令勸農不
得輒用妓樂宴集賓客上謂大臣曰蜀去朝廷遠凡事
多奉行滅裂可令有司立法

是月金主亮詔河南民衣冠許從其便

是夏故相趙鼎之子右承事郎汾奉鼎喪歸塋于衢州
常山縣時李光之獄始竟而守臣左中奉大夫章傑與
鼎有宿憾傑知中外士大夫平時與鼎有簡牘往來至
是又携酒會塋意可為竒貨乃遣兵官同邑尉翁蒙之

以搜私釀為名馳往掩取復疑蒙之漏言潛戒左右伺
察之蒙之書片紙遣僕自後垣出密以告汾趣令盡焚
篋中書及弓刀之屬比兵官至一無所得傑怒方深治
蒙之而追汾與故侍讀范冲之子仲彪拘於兵官之所
蒙之母訴于朝太師秦檜咎傑已甚詔移蒙之蘭溪尉
下其事于浙東安撫司事遂息傑客魏揆之慨然以書
咥傑長揖而歸傑亦不害揆之建陽人少有大志師事
籍溪胡憲蒙之安原人也

原人

秋七月丙子上諭大臣曰近進士鄧楷上疏論諸軍強刺平民為兵非便自今宜令毋得招刺歲終具闕額申樞密院於諸路招填之

戊寅右正言章履言陛下敷德善隣協和海寓是宜內外小大之臣咸懷忠良共享升平之盛士大夫尚有懷姦自徇時肆謗訕如近日吳元美之徒者未盡屏斥是致營營鼓惑羣小欲望睿斷凡異意詆誣之人迹或彰露必嚴行竄殛庶為小人之戒從之

已卯大理少卿李如岡面對乞令監司守臣舉縣令之
有治績者量行旌賞辛巳上謂大臣曰昨已有旨但未
見具名來上可戒令奉行庶為令者知勸民間受惠

癸未皇叔安德軍承宣使司知大宗正事士奎為昭信
軍節度使 保寧軍承宣使提舉佑神觀藍公佐卒公
佐奉祠居平江其妻碩人王氏忽生鬚數莖長寸許未

幾公佐與王氏繼亡相去纔七十日

此據洪邁
夷堅甲志

乙酉左中奉大夫知衢州章傑罷以侍御史曹筠論其

貪墨不法也筠又言國子監主簿吳龜年教其鄉人郭詠上書陰懷異議意不可測罷之

丁亥太府少卿徐宗說面對乞令州縣按月權且放行宗子孤遺請給以俟換給文歷詔戶禮部同太宗正司看詳自南渡後宗子散居四方言者慮其詐冒故令具

譜牒於所在召保自陳更給新歷

紹興五年四月降旨八年六月展限一年

至是舊歷未至者甚衆乃命川廣福建荆湖再展一年

餘州半年

八月辛未施行

已丑左朝散郎福建路提點刑獄公事孫汝翼言泉漳汀三州近經草寇民多逃移乞將三州諸縣不以已未打量均稅一切權行住罷俟盜賊寧息日申取朝旨施行從之以何白旗初平故也汀在深山窮谷中兵火之餘舊籍無存者豪民漏稅常賦十失五六郡邑無以支

吾于是計口科鹽大為民間之患

三州免經界元降指揮不甚詳此據淳熙

中王回奏議修入日歷紹興三十年二月癸丑右武大夫耿洪以獲何白旗之功轉一官未知事在何時去年五月丁酉劉窳等功賞恐或相關但耿洪乃受成閔節制非窳所部耳淳熙十四年四月丙申汀州經界

乙未左朝散大夫知資州楊師錫代還入見上問四川有橫歛否師錫曰自和議息兵以來皆無之師錫又言有司奉行經界失當將肥瘠田畝更不分段及將市居丈尺間隙之處便作屋後空地非元初均稅本意望戒逐路監司將貧下戶最低土色合減稅數均在侵耕冒佃豪彊等人名下有未均去處自可將逐鄉覈零就整之數用與補填上詢問久之後二日遂令諸路看詳改正如先詔

詔在三
月戊戌

師錫彭山人也

丁酉右朝奉大夫知廬州吳達言土豪大姓就耕淮南
荒田者欲除種子外九分歸佃戶一分歸官三年後歲
加一分至五分止歲收二熟者勿輸麥每頃別給二十
畝為菜田不在分收之限仍免科借差役戶部看詳如
所請從之

己亥戶部員外郎陳相對乞戒飭有司不得苛取商
稅詔申嚴行下相合肥人也

八月甲辰朔詔特進提舉江州太平興國宮和國公連

州居住張浚移永州浚自去國至是幾十五年退然若無能為者而四方之士莫不傾心健將悍卒見之者必咨嗟太息下至兒童亦知有張都督每使者至金國其國必問浚今安在 降授左朝散郎南安軍居住孫近移處州降授左中大夫歸州居住万俟卨移沅州左中大夫江州居住李若谷移饒州左中大夫興國軍居住段拂移南康軍降授左奉議郎筠州居住李文會移江州而自若谷已上皆提舉江州太平興國宮如故用尚

書省檢舉也 右朝奉大夫王超特降三品勒停坐前
知雷州日趙鼎李光貶責經過超排辦迎送收置物色
專差人賫送過海通往還及遣候兵往光處私役故也

超紹興二十三年
十二月丁亥編管

丙午保信軍承宣使提舉萬壽觀曹勛許便居以勛引
疾有請也

丁未直敷文閣知盱眙軍畢良史卒

戊申詔改建大理寺先是監察御史湯允恭面對言今

朝廷盛明百司一新獨大理獄湫隘非使乃命改建以

其地入景靈宮尋用寺丞石邦哲言增創使院併其家

居之仍嚴其出入之禁

在今年九月朔今併書之

刑部員外郎章

燾面對乞申嚴法禁病囚非兇惡者召保責出或聽家人入侍從之

庚戌右朝請郎幹辦諸軍審計司龔鑒知盱眙軍

乙卯宰執進呈大理少卿李如岡疏論州縣以力役征科逋欠訴訟等事擾民乞戒飭上曰前後轉對上封事

如此陳述者甚多第恐州縣滅裂不能恪意奉行可如所奏行下

丙辰端明殿學士提舉江州太平興國宮何若薨先是衢州言若疾亟乞致仕上驚歎久之曰莫已云亡真可惜也此人似不能言者其實胸中開廓可喜及是秦檜進呈若恩數欲依謝克家例檜曰克家從偽楚為吏部侍郎建炎間任叅知政事以言章罷及朱勝非再相首薦歸經筵意望再入政府以人言不得留遂進封事言

陛下用一人言召臣以一人言去之臣恐四方有以窺陛下其不知聖度包容盛德又不知已之罪如此上曰朕即位之初黃潛善汪伯彥言從張邦昌者多矣當時務闊略且欲安反側彼乃自不知其罪檜曰陛下灼知忠逆之實如天之徧覆神奇臭腐俱蒙帝力而不自知也遂贈若五官例外賜帛五百匹量給葬事 皇叔故融州觀察使士筏贈開府儀同三司追封潤國公筏卒已踰歲始用大宗正司請而命之

戊午左太中大夫提舉亳州明道宮曾開復祕閣修撰致仕從所請也先是開已卒于衢州上覽奏謂秦檜曰當北使張通古等在館議歸疆休兵之時開與李彌遜等不止異議察其用心罪不容誅檜曰陛下兼愛南北斷以不疑徽宗卜永固之安太后遂慈寧之養茲為天下之達孝初開彌遜與王庶等為不臣之逆說誅胡銓上書狂悖陛下獨語臣曰朕初無黃屋心今橫議若此據朕本心惟當養母耳臣踧踏不知所措孟子言舜畫

事親之道貴為天子不足以解憂今人臣出仕或親在
遠不聞願棄官歸養者故知陛下聖孝惟舜為然千百
世相望一人而已於是除開職名致仕其贈官推恩並
停

已未秦檜進呈前侍從見在謫籍人上曰聞莫儔孫覲
尚在近地此輩宜令遠去言官自合論列蓋朝廷清明
忠邪判白姦臣逆子固當屏迹也

辛酉權尚書禮部侍郎兼侍講陳誠之均州觀察使知

閣門事錢愷為大金賀正旦使副起居舍人兼權直學士院王曦武節大夫和州團練使權知閣門事趙述為生辰使副述嘗在遣中以病免至是復命之初東昏王亶之世皇太后歲遺費摩申后禮物巨萬及亮代立遂削此禮誠之入北境預為遜詞諭之金人竟不敢言及還上嘉之

壬戌徽猷閣待制提舉江州太平興國宮潘良貴卒

甲子資政殿學士提舉臨安府洞霄宮韓肖胄薨於紹

興府肖胄明典故多識前言往行與其弟直祕閣膺胄
尤相友愛後謚元穆

丙寅上謂大臣曰近宣州布衣史敦仁上書言州縣多
收水腳錢等事宜付戶部省詳此亦民間之害不可不
禁止也既而戶部乞每石依元旨收百錢數外輒增者
抵罪從之

庚午詔戶部申嚴舊制監司郡守毋得令子弟親戚部
綱以宗正丞王葆轉對有請也

辛未祕閣修撰新知荆南府韓求卒

癸酉左武大夫平海軍承宣使兼閤門宣贊舍人建康府駐劄御前破敵軍統領趙萬添差洪州兵馬鈐轄萬本劉超部曲去為盜後復來歸從軍凡十九年

是月洋州言真符縣民宋仲昌妻一產三子本人姓符國號生子之日適值天申節實皇帝紹隆景命子孫衆多之祥詔付史館

九月甲戌朔上因言宣州米脚錢事謂大臣曰此蓋州

縣並緣為奸不恤百姓朕今日所以休兵講好者正以
為民耳若州縣不知恤民殊失朕本意上又曰國家設
常平倉正為儲蓄以待水旱賑濟宜令有司以陳易新
不得妄有侵移若臨時措畫假貸積穀之家徒為虛文
無實效也

辛巳詔川蜀諸縣鄉村民戶家業並用本名所管稅色
物料依見今州縣衰折則例併紐稅錢舊例鄉村以典
買田產陞降至是左朝散大夫楊師錫知賓州代還論

今田價比昔倍貴或賣田及半則所推價貫已盡戶下
遂無等第差役科配比之創買人戶極為不均故有是
命

甲申降授左承事郎福建安撫司主管機宜文字吳元
美除名容州編管元美嘗作夏二子傳其略云天以商
代夏是以伊尹相湯伐桀而聲其割剝之罪當是時清
商颺起義氣播揚勁風四掃宇宙清廓夏告終于鳴條
二子之族無小大少長皆望風隕滅殆無遺類天下之

民始得安食酣寢而鼓舞於清世矣夏二子謂蠅蚊也
其鄉人進士鄭煒得之持以告本路提點刑獄公事權
福州孫汝翼汝翼惡之抵煒罪煒怒走行在訴元美譏
毀大臣秦檜從尚書省下其章元美家有潛光亭商隱
堂煒上檜啟亭號潛光盖有心於黨李堂名商隱實無
意于事秦他皆類此檜進呈上曰元美撰造謗訕至引
伊尹相商伐桀事其悖逆不道甚矣可令有司究實取
旨至是法寺言元美因與李光交結言事補外心懷怨

望遂造二子傳指斥國家及譏毀大臣以快私忿法當
死上特宥之汝翼已移知荆南府亦降二官元美卒於

貶所

煒二十五年十二月壬子編管元
美二十六年七月癸亥追復元官

乙酉侍御史曹筠言學校科舉必欲得真賢實能而近
來考試官多以私意取專門之學至有一州而取數十
人士子忿怨不無遺才之嘆欲望特垂戒飭其有不公
令監察御史出院日彈劾庶合士心從之

丙戌詔金國人使自今於淮陰縣取接令本路轉運判

官沈調如法修蓋館舍以金人言人使合於近便處山東邳州路取接往來故也

丙申詔曹筠附下罔上可罷侍御史日下出門

筠罷未見事因

考當

自建炎初劇盜范汝為竊發於建之甌寧縣朝廷命大軍討平之然其民悍而習為暴小遇歲饑即群起剽掠去歲因旱凶民杜八子者乘時嘯聚遂破建陽是夏民張大一李大二復於回源洞中作亂安撫使仍歲調兵

擊之布衣魏掞之謂民之易動蓋因艱食及秋乃請於
本路提舉常平公事袁復一得米千六百斛以貸民至
冬而取遂置倉于長灘鋪自是歲歛散如常民賴以濟
草寇遂息議者謂掞之所請乃古社倉遺意使諸鄉各
有之則緩急可以無憂而民之從亂者鮮矣

冬十月丁巳監察御史湯允恭為殿中侍御史

甲子拱衛大夫同知觀察使胡悺提舉佑神觀悺初得
外祠王居正以姦黨駁之命遂格至是秦檜以京祠處

之

戊辰右廸功郎安誠除名惠州編管誠嘗為故相朱勝非所辟勝非之薨也誠自作齋文訕及朝政為郡守所發刑寺鞠實乃有是命

庚午參知政事余堯弼簽書樞密院事巫伋請自今朝參退依典故權赴太師秦檜府第聚議從之時檜以疾在告故也

十有一月甲戌詔右武大夫忠州團練使提舉台州崇

道觀趙子彥特許久任俸賜如總管 盱眙縣尉夏俊
罷以使人過淮俊輒引惹生事故有是命

乙亥汝州觀察使提舉佑神觀朱孝章為水慶軍承宣
使孝章淵聖皇后兄也自訴二十五年未嘗進秩乃特
遷一官

癸未國子監李琳面對言本監經史未備乞下諸州有
本處起發從之

初徽州布衣汪大圭嘗伏闕上書抑歸本貫至是更名

復來上書欲舉前事為有司所獲壬辰詔免真決送二

千里外州軍編管

癸巳大理評事黃子淳面對乞將州縣耕牛科於民者
悉行出賣所租斛斗一切蠲免詔戶部者詳

十有二月丁未大理寺丞莫濛面對乞進納流外出身
人不許注諸州曹官詔吏部者詳取旨 集英殿修撰

張公濟卒

丁巳左朝奉郎監尚書六部門鍾世明轉對論富室乘

農民之急貸以米穀使之償錢而又重取其利乞令止償本色從之

庚申詔使人到闕賜宴等自今並須豐潔如稍減裂其主辦官吏並寘重法

辛酉殿中侍御史湯允恭言自設民事律以來士大夫多為舞文健訟所持而縣令闕員徃徃無可入者望將民事被罪之人分定公私贓罪定斷詔吏部看詳迄不

行

二十六年正月
戊辰除民事律

甲子秦檜始朝詔肩輿至宮門命二孫直寶文閣塌直寶謨閣堪掖以升且命毋拜上甚喜曰且得與卿相見檜頓首謝上曰瑞雪應時可喜又使人在途並無須索足見省事

己巳金國賀正旦使正奉大夫祕書監兼左諫議大夫蕭頤中大夫尚書禮部侍郎翰林待制兼行太常丞王競見于紫宸殿競陽安人曾祖尚恭熙寧間仕至光祿

卿

是月敷文閣待制知廣州薛弼卒

是歲宗室子賜名授官者十有六人 諸路斷大辟二

十有五人 金主亮稍習經史慕中國朝署之尊宥有

遷都意是歲因下詔求真言而上書者多謂上京僻在


一隅官艱于轉漕民難於赴愬不若徙燕以應天地之

中與亮意合乃遣尚書左丞相張浩右丞相張通古左

丞蔡松年調諸路夫匠築燕京宮室皇城周九里三十

步其東為太廟西為尚書省宮之正中曰皇帝正位後

曰皇后正位位之東曰內省西曰十六位妃嬪居之又西曰同樂園瑶池蓬瀛柳莊杏村皆在焉其制度一以汴京為準凡三年乃成浩遼陽人也



建炎以來繫年要錄卷一百六十一

建炎以來繫年要錄卷一百六十一金人地名考證

薩里罕

原書作撒離唱
誤改見卷十一

沙津

原書作沙只即金史
之沙祗並誤今改正

唐古

原書作同古誤改
見卷一百六十

烏爾袞

原書作烏慮
幹誤今改正

尼瑪哈

原書作粘罕
誤改見卷一

烏舍

原書作兀室
誤改見卷一

羅索

原書作婁宿
誤改見卷一

達蘭

原書作桂懶
誤改見卷一

費摩

原書作裴磨
誤改見卷一百十八